

頤道堂詩外集

頤道堂詩外集卷六

錢塘 陳文述 退庵

古今體詩 香奩

美人六首

美人如明月三五光徘徊露下玉階濕風颺羅幃開麗華
桂枝曲嫦娥明鏡臺珍重慰寂寞流照上青苔

美人如碧雲縹緲雲中君絳河麗妙鬢碧落敷華雲卷衣
誤秦女迴風疑洛神日暮盼不極一片陽臺春

美人如名花可翫不可褻穠芳艷春霞幽姿澹秋雪綽約
束腰素玲瓏生眼纈懷袖拂畱英三年香不滅

美人如香草相得愛同心臨流擷芳杜人遠瀟湘深忘憂

夙所懷合歡匪自今古調響空谷哀絃彈青琴
美人如異書古艷無由俗相對一樽酒夜靜焚香讀塵心
澹欲無勞生願亦足努力愛華年無事此爲福
美人如青山相依欲終老秀色雙蛾眉中隱此中好錮疾
深烟霞凡心謝蓬島睠茲一心人玉顏願長保

題含章閣內史小影八首

紛紛香雪壓朱闌不采應愁玉遽殘約鬢最宜雙影照賞
心祇覺一枝難冰華可得如人澹翠袖還憐出手寒憶到
西溪三萬樹便思椎髻理漁竿

折梅

江南斜日滿汀洲欲採蘋花不自由流水聲中羅袖薄青
山影裏畫船秋許迎桃葉憐春漲不唱蓮花怯暮愁說到

季蘭應更憶讀書燈火舊紅樓

採蘋

十年曾賦合歡詩海內爭傳絕妙詞
媿我春華銷彩筆勞卿深夜理紅絲
花心細繡針神巧蘭氣微吟繡口遲
更憶金臺題別曲生平佳句尹邢知

繡詩

一函辛苦翦燈鈔紙上香多浣不消
點筆閒情思婉嬾簪花書格認娥媼
粉籤排日烏絲寫絳帖他年玉枕雕
跨虎青山吾有願遊仙祇覺媿文簫

寫韻

舉案齊眉稱畫圖更因佐餽製芳腴
最憐經歲勞中饋記得來時問小姑
隣女乞傳新食譜寒家仍是舊山厨
垂髫舊事愁聽說奉母當年學孝烏

調羹

碧梧庭院晚陰長殘雨樓臺月澹黃
聽到松濤酣煮夢滴

來花露靜生香因徵故事千回憶消得塵心一味涼小樣
龍團猶愛惜辛勤閒話採茶孃

試茗

空笑空顰百態工何人臉際似芙蓉淡黃新月初三夜淺
碧春山第幾峰楚楚愁痕無礙瘦纖纖黛色不須濃艷情
記得催粧日細碾香螺看玉容

譜眉

春雨盈盈損蠟花秋苔黯黯上文紗諸昆失意同揚子小
妹傷心說蔣家偶以思親夢江水更因憶遠感天涯十年
辛苦從頭訴愁絕高樓側鬢鴉

撫髻

題長洲女士李晨蘭

佩金

生香館集

不信紅閨有此才淋浪墨瀋化瓊瑰瀟湘竹許裁斑管玳
瑁簾應序玉臺麗句不嫌花綽約苦吟常共月徘徊早知

詩思清于雪曾見驚鴻小影來

如此聰明便合愁無聊心事託悲秋紅鸚未許知前世白
鳳空勞慕遠遊二月落花如夢短一江春水向東流瑤清
女伴如相憶花葉緘題寄十洲

碧海青天寫性靈裁花作骨亦瓏玲早梅春淺凭粧檻暮
竹寒多倚翠屏應與素娥居壁月須知玉女是明星賞音
省識人間少一曲冰絃愛獨聽

紫簫親自按宮商細膩填詞更擅場石帶暗香追北宋羅
衾夜雨怨南唐吟成澹月疎簾下寫向春風玉鏡旁百幅
烏絲應倍惜簪花親仿十三行

蘭室

神女蘭爲室仙娥桂作堂重門深別院曲逕轉迴廊歌囀
銅環叩鷄催繡幕颺蟣蛺連網戶玳瑁飾雕梁接檻雙華
榻聯楊雨洞房紗屏空峽蜨羅幌隱鴛鴦四壁排籤軸千
函疊縹緗燕鴛題茂苑雲水畫瀟湘梅片飄琴薦菱花臥
筆牀翹軒青鏤管蘸粉碧瑤箱小字簪花格新詩古錦囊
詞牋填北宋書角折南唐詠絮才真艷銘椒句亦芳墨痕
銅雀潤水滴玉蟾涼鳳餅細縑味獮蠻餽釘裝瓊圖百子
瑞盤設五辛良侍女間腰素雛鬟掃額黃幸從諸弟後親
拜大家粧徙倚紅簾影畱連翠氎香真如廣寒夢月姊認
霓裳

四月十七日尺五園卽事

城南韋杜花無數名園更在花深處綺樹千重綠到門磯
香九曲紅成路一路紅香艷曉霞豐臺初放幾分花低飛
蛺蝶如相引導我尋芳白鼻騮昨宵微雨香泥軟柳絲拂
面春雲暖寶粧冠紫蕊珠紅綵雲絡徧含真館琳牕正對
萬花開繡作樓臺錦作堆乳燕慣從仙舫渡流鶯先報鉤
車來圓露凝光珠翠濕五銖衣薄靈香襲翠水無波照影
明瑤池會上眞靈集花枝扶過小紅橋水曲風迴褰褻飄
六出雛鬟呼錦瑟九華少女字靈簫縷金囊綰靈飛綬瓊
佩玲瓏舞垂手有人生日是今朝萬朶玉盤齊進酒翠袖
爭題都荔詞十行玉札界烏絲眞珠字寫簪花格添作仙
家本事詩微吟同倚青鸞聽娥娥紅玉凝粧靚花氣薰濃

繡蜨裙花光逼暗盤龍鏡綽約花前綽約人那知原是如此
花身仙風吹散香嬰氣併作芙蓉日暮雲彎環金帶逍遙
玉人自千秋花百福朱鳥牕前再拜人簪毫親記墉城錄
瓊臺如水月華明五色班龍合隊行婪尾一尊花下酹爲
花歲歲祝長生

生香館內史刊古今閨閣法書爲簪花閣帖書後

紅鈴押尾仿楊娃眞鑒端應說大家蘇若蘭詩畱斷錦蔡
文姬字譜哀笳研神小記唐天寶玉府新鐫宋奉華珍重
彤籤雙管筆手排閣帖署簪花

蠶眠界畫細鈎銀品定曹娥與洛神蠶粉漸消香暈淺麝
煤纔脫墨痕新重摹本行參金偈舊揭靈飛辨玉眞我是

琅邪王逸少學書曾拜衛夫人

玉版烏絲次第刊來遲彷彿步珊珊
貢詩幕府王崇嘏點筆高樓李易安
殘本漫憐花作骨開函依舊氣如蘭
繡襦印帳書唐韻修到文簫大是難

玉臺書法知尤好麝月金星衆妙傳
眉子香殘張遇墨浣花春試薛濤牋
每從漱玉新詞上親見珍珠小字圓
也擬雙鈎摹紫石停雲佳話付他年

古別曲

卻因將別憶初逢不隔珠簾已萬重
問訊芳年知荳蔻本來花貌比芙蓉
丁香暈紫貽瑤珮卯酒分紅上玉容
祇有閒愁深似海鏡中長日鎖眉峰

絕代才華絕世姿生平低首此蛾眉牽雲曳雪三年怨嚼
蕊吹花一卷詞春雨頻教題鳳紙曉寒曾乞寫烏絲傳來
一事尤堪憶午夜明燈讀我詩

六曲圍屏四壁書洞房空稱玉人居梅花墮片驚鸚鵡芸
葉霏香走蠹魚蘭幙春雲紅壁暖棗簾秋水綠牕虛難忘
人日題詩處夢到遊仙恐未如

銀浦虛傳駕鵲橋由來七夕可憐宵篆縈一縷香初蕤蕊
結雙花燭漸銷河漢仙靈空有影星辰離合亦無聊曾從
朱鳥牕前見贏得年年感寂寥

晝闌重拍正華年記取名園本事妍進酒我來三寶地看
花人坐四禪天白蓮繡偶香呈佛紅藥題詩句欲仙不信

將離先作識青真鸞鶴去如烟

銅車宛轉去難留楊柳河橋路阻修從此東南飛孔雀虛
傳西北有高樓今生知己前生果他日傷心往日愁嵩嶽
三花天樣遠碧雲無際水空流

艷可銷魂秀可餐憐才心似曲闌干傾城風貌神偏逸絕
世聰明寫亦難三尺琴橫聊寄怨五銖衣薄易生寒冰綃
畱得驚鴻影清夜焚香再拜看

百感無端獨夜吟客愁先約別愁侵傳聞消息腸應斷諱
說相思意轉深纖到藕絲空寄恨書殘花葉當題襟分明
香草靈均意更有何人識苦心

題金匱女士楊蕊淵芸琴清閣集

梁溪詩老舊名家

蕊淵爲蓉裳
農部愛女

家學親傳到碧紗林下風

清推道蘊盤中句好報秦嘉錦囊夜織龍紋鐫斑管春開
蝶夢花不信品題到溫李祇應仙骨最清華

玉臺風細靜無塵六曲圍屏護好春燈下繙書閒課弟酒
邊覓句爲娛親三生慧業尋瑤島七寶莊嚴拜洛神爲問
蓬萊諸女伴海天傳唱更何人

惜春心緒似悲秋眞箇檐前卽玉鈎繡口慣談千古恨仙
心總帶一分愁花盟月社聯吟館燭暗香沉倚畫樓莫卷
珠簾奏神雪闌干怕有水雲浮

芳蘭吹氣靜如烟吟到遊仙一惘然花葉題詞雲綽約藕
絲織句夢纏綿六朝古月回文字七夕明河雅集篇累我

殷勤讀深夜然脂寫盡鯉魚牋

題嬋娟錄

一名金箱薈說所載皆古今閨閣文字金匱女士
楊蕊淵所輯也

麝粉銷黃不染塵掃眉才子更無倫然脂自續傷心史展
卷如逢絕世人四壁琅函香在手一牀斑管月隨身簪花
書格尤佳麗半是曹娥半洛神

反袂沉吟定幾回傷心羅綺盡成灰千秋怨耦還佳耦一
代仙才又鬼才帝子可能金作屋麗人眞合玉爲臺六宮
哀怨三生事都向蛾眉筆底來

大有閒情絕妙詞十行翠札寫烏絲粧樓作記思張泌畫

燭修書笑宋祁離合姻緣仙縹緲人天眷屬佛慈悲萬花
堆裏閒雨讀勝寫瑤清碧落碑

半下紅簾擁碧紗墨香銅雀譜芳華春風楊柳南朝樹夜
雨菖蒲北里花何處堪題金縷曲此中便是玉鈎斜徐陵
才筆吾猶愧乞序偏勞說大家

女士乞余
作序故云

後古別曲

更無鸚鵡話前軒綠暗牕紗氣不溫碧落無塵雲寫影青
天如水月留痕雁聲關塞頻催夢柳色河橋易斷魂曾是
前番送行處不堪重過郭西門

畫羅春雨慣填詞北宋南唐絕妙辭玉女未能消古怨美
人原不諱相思琳宮舊侶雲千疊斑管新吟酒一卮悟到

前塵回首憶遊仙夢裏舊題詩

流水聲中綠綺調江天無盡意迢迢冰絃秋雪催哀怨玉
軫春星慰寂寥杳杳飛鴻空日斷冥冥睡鴨易魂銷粧臺
畱取黃金盒好貯心香細意燒

緩步微聞楚珮琤靈均幽怨託蘭茝華年重指星三五名
印親貽玉一雙讀畫侵晨窺素壁評詩深夜燦銀缸閨中
大有憐才意吟徧蕭湘綠綺牕

雲鬟十八嬋宮鴉鏡裏仙姿麗曉霞妙手丹青空色相上
元風貌自芳華從來粧束宏時世畢竟人才出大家曾寫
朝雲學周昉畫屏春膩牡丹花

高閣塵封去若仙乍涼時節欲霜天攀來楊柳都離思簪

到茱萸是別筵
小妹牽衣情鄭重
老親制淚語纏綿
畫輪未許斑駁送
不聽驪歌倍惘然

仙貌長芳勝
好春蛾眉應賦洛川神
謝庭花發邀蘭佩
秦女春遊駕羽輪
嫁得參軍金作屋
捧來嬌女璧爲人
他年重向雲階敏
莫忘崔盧是至親

龍山南去古長洲
一樣才名第一流
蠶粉尙畱花氣息
烏絲親寫玉溫柔
秋風蕭瑟新亭障
春雨闌珊舊畫樓
目斷綵雲倍惆悵
月明嵩少憶中州

答歸佩珊女史並勸移家吳門

十年前讀海棠詩
繡幕微吟想見之
靜女三章取彤管
碩人之賦此蛾眉
月能畱影應呼妬
風解吹花合喚姨
祇是

雲容未曾見碧天如水夢如絲

頻年憔悴惜芳蘭茆屋牽蘿翠袖單水榭陰風雙管瘦小樓聽雨一燈寒郎君文藻憐同馬脊屬神仙憶采鸞曾乞朝雲寫花葉朱絃疏越起微歎

春江魚素泛桃花客字珍珠寫韻紗畫裏果然人似玉粧成想見鬢如鴉謝孃才語畱新詠班女能文是大家一卷金荃數行墨凭闌讀到夕陽斜

海隅蕭瑟易悲秋知爾眉痕不解愁偕隱此間堪賃廬學僊仍不碍居樓春山大可香車度綠水偏宜畫舫遊我媿陸機稱地主尙能掃徑待羊求

佩珊有移居吳門之意有尼之者以詩見寄輒爲答

之

烟波魚素翦燈開
辜負閒庭掃亂苔
綠水不浮蘭槳至
青山虛望銅車來
一編詩補題襟集
雙管花憐作賦才
惆悵江南花月夜
碧雲天際悵徘徊

題席道華女士 佩蘭 長真閣詩卷

凌波小影最徘徊
詩亦翛然有別裁
蘭棧莫招湘女去
桂旗如擁洛妃來
萬花紅翠明粧鏡
中夜星辰朗玉臺
不媿袁絲稱第一天
人風貌謫僊才

花史圖女士屬水仙隨園女弟子以女士爲第一

縹緲峰頭鎖翠霞
青山舊是玉人家
東風影裏雙紅豆
西母池邊萼綠華
甲帳深沉閒寫韻
辰樓修曲笑拈花
匆匆朱鳥牕前過
爲問雲容禮碧紗

女士有拈花小影

夫婿才名重玉堂玉堂爭及鬱金堂偶然擊鉢催雙管畢
竟支機遜七襄削牘知應仗刀尺畱賓親與作羹湯餞春
筵上瓊酥味飽食防風口尙香子滿譙子雙紅豆
齋女上親爲治具
河東門第魏成君悟到前身是玉晨駢體六朝追正始瑤
華一卷署長眞琴箏樓閣迢迢夜花月簾櫳澹澹春如此
清才與高韻一時同調更何人

和席道華見題碧城仙夢圖卽用原韻

樓臺金碧隱雕甍十二紅闌夜月明海上青山成獨往花
前白石證三生賦成巫峽畱雲氣聽到霓裳悟水聲太息
蓬萊更清淺一杯清露乞澂泓

原作

琴河
女士席佩蘭
道華

白玉雕闌碧玉葢似分明又不分明果然靈境非人境
畢竟他生勝此生淺水自尋前度影落花偏認步虛聲
微雲幾縷春痕在刻向瑤天月一泓

又和題雲藍索句圖

苦心未許學陰何也少詞源瓠子河偶向玉臺翻舊詠已
勞畫舫譜新歌朝雲坡老春成夢暮雨吳娘水似羅官轍
詩名兩無著油幢蹤跡媿沙哥

原作

水晶宮事近如何清淺鷗波卽絳河螺子墨九眉子硯
紅兒詞句雪兒歌新聲譜就調羸管小字書成繡越羅
雜體江淹三十首綠窗新索教鸚哥

題屈宛仙女士

秉鈞

韞玉樓詩卷

雲英聲望儷雲翹韞玉樓中韞玉瑤公子才名繼松雪美
人家世有離騷室中蓉葉明秋露莊外蓮花落暮潮此是
僊家好夫婦采鸞端不讓文簫

所居有集芙蓉室

如此詩纔稱女郎玉情瑤怨總芬芳謝庭風絮畱佳話楚

澤幽蘭是國香雙玉鏤成雲膩璧五花和就露凝漿

女士詩屬

對極工五花露女士茶名

聰明更試調羹手金盃曾分鳳髓湯

餞春之筵女士

以鳳髓湯佐餚

虞山凝翠尙湖開此地端應有此才半世閒身詩裏過十

年清福病中來

集中句

解從金粉畱真意洗盡鉛華見別裁

讀到月明花靜夜朱絃三歎起徘徊

一幅吳綾一首詩更勞畫筆染烏絲分明蕙質蘭心在想
見荷風竹露時泮閣硯囊皆秘寶蕊宮花史是相思扁舟
昨向琴川過乞得冰紈寫折枝女士善畫自描尤王真閣
中李龍眠也所作蕊宮
花史冊別本以花代人極其工妙
余過泮閣蒙以一扇三幀見貽

屈宛仙畫白蓮花

銀塘夜靜涵空烟縠紋不起鷗夢圓鉛華洗盡見眞色明
璫翠羽來翩然美人寫花如寫影玉臺不掩冰華冷畫中
花似鏡中人縞衣綽約霓裳整夜遊憶泛扁舟行珊瑚珠
露流無聲風裳水佩不知處十二畫橋秋月明

宛仙繪白描詩囊見貽賦此奉謝

十年蕉萃感名場回首春華夢未忘萬里關河走冰雪一

生花月譜宮商江淹賦恨雲凝渚宋玉悲秋月滿湘人己
無心寫金粉美人珍重寄詩囊

一幅吳綾一幅花玉臺妙筆寫烟霞偶因拂素畱香蠹想
見簪毫倚碧紗鶴舞緣知悟書品龍眠應不媿名家祇慚
不稱羣芳譜辜負仙人夢綠華

長慶淵源見一斑瓣香心禮白香山得邀刀尺囊裁錦遠
勝弓衣句織蠻艷福可能消半臂閒情應抵唱雙鬟掌書
兼付司花使秋水鷗波憶玉顏

寫翠傳紅我所思生平知己幾蛾眉畫家此是名家畫詩
事應添本事詩翠黛人遙秋水濶玉關天遠暮雲遲蕊蘭

兩字分明記書記年來纔有絲

余舊有蕊蘭書記小
印謂蕊蘭展蘭也

弔屈宛仙

盛鬋豐容第一人又從花夢感蘭因傳家楚些招湘艷竝
世陳思賦洛神玉女謫來星證果素娥歸去月爲輪繡襦
甲帳深沉地唐韻流傳墨尙新

驂鸞人去楚天霞蕙歇蘭銷賸碧紗小影人間呼道韞前
身天上說凌華隣泮閣冷拋香蠹韞玉樓空噪乳鴉彈到
幽蘭響秋雪一時腸斷蕊宮花

曾繙清閣皂羅幘曾禮眞靈位業圖貽我詩囊惜珠玉憐
君硯匣伴珊瑚香銷鏡檻春山斷秋冷琴河夜月孤紅豆
花前賦埋玉病中猶爲弔蘼蕪

玉怨珠啼不可聞空階涼葉墜紛紛渡迎桃葉乘秋漲壯

冷蓮花隔暮雲海氣遙連齊女墓湖陰新築柳娘墳海隅
嶺畔山如黛何處香泥葬畫裙

辛酉春日過京口奉訪佩香女士不值畱贈四律

絕代蛾眉此異才香斂麝月十年推三茆笙鶴迎珠珮兩
點金焦對玉臺綺語早隨金粉盡秋聲慣聽雨風來小軒
幽絕人間世修竹梅花四面栽

更有何人鬪尹邢三唐詩格最瓏玲十分寒影瘦娥月一
點秋鐙明女星風雅正聲歸畫閣江山清氣助仙靈吟聲
夜落寒潮急讓與魚龍自在聽

黃蘗澹服五銖輕翠水西頭舊主盟靜夜入天參八夢空
湘蘅芷證三生孤懷清似江心鏡詩律嚴于京口兵豈但

閨中無敵手眼前誰與競才名

題徧揚州家澗州江山金碧最宜秋幽蘭心苦偏工怨暮
竹寒多善寫愁詩許名王援筆頌畫容我輩寄書求夢樓
老病隨園死惆悵遊仙弔十洲

京口晤駱佩香女士賦贈四律卽用其體

六年前過寄奴城春水連天一夜平君向山中尋藥去我
從江上挂帆行詩篇未暇樓中寄閨閣爭傳海內名曾錄
秋軒佳詠在天涯旅夜感秋聲

一夜青鸞埽落花橫江風急片帆斜暫因春水停蘭漿重
向雲階斂碧紗後世何如曹比玉前身應是婉凌華青綾
下拜天人在畢竟嬋娟出大家

瑤池高會識羣真不是湘娥與洛神王母玉顏三十許侍
兒花貌一雙人論將班左原吾輩序到崔盧是至親乞與
丹青寫團扇夢中彩筆總生春

萬花瓔珞擁香龕珍重新詩半日談此地無慚人第一再
來應待月重三生天慧業君應早學道中年我未堪莫憶
仙山使歸去玉臺畱鎮大江南

女士云將歸隱
句曲故及之

題家雪蘭女士

德卿

靜華館詩集

詩境真應號靜華烟江寒水暮天霞人間清氣歸秋色塵
外仙心託晚花竟與王韋爭五字祇容楊李說三家

謂蕊淵晨

蘭

吾宗名輩知多少第一傾心是碧紗

不許纖塵近筆端瑤樓玉宇最高寒清難一世惟餘雪嶺

盡羣芳祇有蘭聞道仙姿如立鶴前身瑤島定驂鸞六朝
金粉吾猶媿未敢燈前比較看

冰甌絛雪寫烏絲萬種閒愁百首詩瘦影可無涼月照孤
懷應有碧雲知嫁梅春早紅羅遠倚竹寒多翠袖遲夢到
蓬萊期第一碧城題句費尋思

曾爲余題碧
城仙夢圖

此才真合稱烟蘿林下清風未許過書答大雷惟鮑妹帖
繙小字認曹娥閨中標格如斯少刪後精華不在多吟到
月斜鐘定後瀟湘葉落水微波

題從姊秋穀

長生

繪聲閣詩集

濃香宮麝寫烏絲題徧班姬鮑妹詩一卷珠璣傳伯姊六
朝金粉定吾師碧城醒我遊仙夢繡偈吟君禮佛詞記取

宣南坊畔宅春明初拜畫簾溼

湖山佳麗水雲秋面面遙山擁畫樓紗幔傳經慈母訓璇

機織錦女兄愁龍沙夢遠迷青海長姊端生適范氏婿以累謫戍鴛牒香

銷冷玉鉤仲姊慶生早卒爭似令嫺才更好金閨福慧竟雙修

碧浪蘋香水一涯韋郎門第最清華傳來鸚鵡簾前語繡

出芙蓉鏡裏花梅笑遺編寒樹雪名集更聞羣從皆閨秀兩姑皆有

詩集梅笑周太恭人集名更聞羣從皆閨秀姊周星薇長姑淑君小姑渚蘋

皆能詠絮何勞說謝家

繪水由來說繪聲玉臺詩格水同清偶從寒夜燒燈讀如

聽幽泉隔竹鳴江上微波秋瑟瑟畫中遠浦月盈盈仙郎

縱有凌雲筆作賦還勞翠管評

題錢塘孫茗玉女史琦羅軒詩稿

十年前讀羅軒草聞道盈盈十五餘已覺幽懷如水淡更
憐詩格比花陳杏烟春淺紅三月蘋影秋寒碧一渠似爾
才華真絕世篝燈吟到綠牕虛

老我天涯又幾秋故鄉消息總悠悠美人遲暮偏多病寒
女離騷不解憂薦到畫紗蘿待補倚來翠袖竹同修江東
我是羅昭諫寥落心情一樣愁

南下扁舟認故林祇餘一事最關心塵中莫更談知己意
外猶能遇賞音問訊華年橫錦瑟寄懷香草託青琴尙憐
冷雨幽窗夜弱質纏綿未起沉

微雨絲絲黯畫船落花風起說嬋娟諾成鳳尾無人識畫

到娥眉祇自憐偶以薰香題睡帛更因點筆譜銜蟬

女士撰

諸葛羅

新編更許從頭讀吟向湖山日暮天

錢塘孫茗玉女史歸山陰高君穎樓以新刊貽硯齋

詩集見示竝索題額粉卷聯吟圖因成四律末章

竝寄碧梧仙品嫺卿三女士同梅史作

墨香麝月暈燕支想見揮毫鬪捷時我以名家推管趙人
將仙侶比商祁斜簪散髮垂雙髻卻月橫雲譜十眉絕勝
歸來堂上事品茶笑覆掌中卮

銀浦何年渡女牛靈簫墨會渺無儔神仙眷屬馮雙禮金

碧樓臺仇十洲翠袖影凭粧閣曉青山花落鏡湖秋春明

舊事從頭記辛苦尊前託蹇修

女士姻事余與梅史在都
諱託胡書農太史爲擇壻

才其實並無
葭莖之戚也

千巖萬壑種胡麻大好樓居敞碧紗
梁孟同歸高士傳劉樊原是列仙家
春波蘭渚年年月秋色雲門處處花
寫罷烏絲寫紈扇不妨徐淑勝秦嘉

君家姊妹好才情蘅薄蘭皋有盛名
顏色互憐金屋豔詩篇都似玉溪生
香奩花月中年感墨會湖山異日盟
絳角流雲秋夢遠碧天如水夜盈盈

同作

查揆

仙樓嬌嬋鳥綿蠻萬壑千巖好閉關
偕隱風流傳蠶室考盤詩句趙寒山
俳諧賭韻徵貓事夫人有寄襖襖分
花破酒顏恐被山陰鸞鶴怨雲烟驅使未曾閒

畫眉纔罷便論文好語人天夜尙聞悟後前生名寶月
笑來女壻喚微雲問奇宛委書千帙促坐商量月十分
見說如花苧蘿女新詩爭繡鬱金裙

韋杜年時尺五天紛傳樂句到尊邊公卿已少西河集

婚嫁方求北燭仙絕代寒蘿歌窈窕有人漂麥證因緣

如何好事璆韶侶未拜三花少室前

此紀乙丑與雲伯在京師同屬胡書

農太史爲茗玉蹇修事

雞蟲得失付洄沙陀利容華勝若耶儘有明湖畱賀監
更無遠道怨秦嘉尋秋玉筍攜寒具消渴雲門響麴車
咫尺蘭茝山下住樊英夫婦亦仙家

抵家後將以拙集呈孫碧梧女士而女士先介令叔

花海

灝元

貽書來乞感賦一首卽題湘筠館詩稿

十年慣學婁東派天與鶯花索詩債江南老輩毘陵楊同
禮華嚴窺法界闡閣何人此席尊才名爭說武陵孫百篇
長慶流傳徧白徧梅花又一邨十年浪跡長安陌里巷聞
名曾未識玉臺小集寄無從湘筠閣遠空相憶忽展雲藍
五色牋卻因大阮索詩篇始知絕代嬋娟意自有千秋翰
墨緣殷勤近著勞相示淋漓百幅珍珠字不信吹花嚼蕊
才儘多弔夢歌離意鏡檻紅闌對海門歸舟曾泊聽秋軒
上元風貌青綾拜江左娥媼與細論謂駱佩香年來才調誰稱
美簪花我識長洲李謂晨蘭杭州曾見此人無高情如月心
如水催人燕子掠春燕又是烟江解纜初花葉書殘還問

訊玉顏小妹近何如

謂令妹仙品

題梁溪女士顧羽素例 芷香館詩集

梁溪詞客弔華陽家學流傳到女郎

羽素爲詩人笠翁女

小閣春雲

閒顧影空江秋水自生香無雙人靜如詩好第二泉清覺

韻長讀到花烟蘭露句玉笙吹得羽衣涼

養花天氣雨如烟滿庭露氣秋

蘭白皆集中句也

澹于素月韻于琴微雨幽窗刻意吟珍重芳名剡茗玉玲

瓏小印浣蘭金卷中錦字書蠶日枕上梅花寄葉砧愁絕

珠江不逢雁秋衾分夢遠相尋

琴清才筆擅芳閨一卷金箱屬品題中表崔盧同艷絕當

時王謝本名齊眞靈會散遙天碧神女樓空夕照低惆悵

芙蓉湖上水晚山如畫客舟西

羽素與楊蕊淵爲中表姊妹

弟兄聯璧定何如

謂簡塘兄弟

似爾才名稱小姑翠袖當花憐

荳蔻玉臺倚檻詠茱萸簪花帖好行行玉聽雁詩成字字

珠我說嬋娟應第一問君曾識此人無

謂李晨蘭

題寄女蘭妃畫蘭

蘭妃名之淑字耕畹粵東黃參軍祖香女參軍與

余訂昆弟交以耕畹寄余鄰下耕畹善畫蘭竹蘭

尤妙余因字以蘭妃從余二女行也近以畫蘭數

幀見寄因爲題之

小影分明當寫眞上元嬌女洛川神閒從澹墨疏香外念

爾蘭心蕙質人文淑丹青難並世憚冰家世合爲隣何能

阿母前頭去姊妹花前一笑春

吳江弔吳珊珊女士

瓊仙

七字吟成意可哀
曇花香盡雨中開
傳來佳詠迴文字
想見仙人寫韻才
梨里春寒花作雪
櫻湖波冷水生苔
十年四度吳江路
惆悵歸帆弔玉臺

題蔣蓉岑女史

慧珠

仙意圖

羅雲無定水微波
一棹仙槎渡絳河
不信瓊樓秋似水
五銖衣薄峭寒多

桂樹婆娑蔭畫闌
霓裳一曲韻珊珊
晚風涼透芙蓉骨
始信仙宮號廣寒

別意

翩若驚鴻稱五銖修蛾應譜十眉圖簪花閣下裁文錦寫
韻軒中理繡襦金海月明秋水濶紅樓人遠夜燈孤謝孃
鮑妹都歸去又向青溪送小姑

靈簫墨會篆烟遮雲髻娥娥擁鈿車捧出佳兒珍似玉窺
來阿母貌如花爲貽繡佩繡金綫乞寫烏絲綴碧紗一樣
嬋娟都絕世尹邢相對總風華

海燕雙棲玳瑁梁洞房七十紫鴛鴦侍兒溫軟工吳語夫
婿才名勝陸郎隔幕眞成衆香國避寒曾見內家粧我詩
僥倖如花葉幅幅親題字一行

生平三好學蕭琛其柰中年百感侵憶到大家嗟久別慙
聞小病倍關心潞河烟水歸帆穩吳苑鶯花舊夢沉我亦

秋深便南去雲階重斂話題襟

寓感

罡風吹散碧天霞目斷高樓問謝家曾送香車歸北燭空
尋仙錄憶東華洞房親種紅梔子水榭微吟白藕花記向
簸錢堂下見春雲一半尙垂鴉

當年兩小各無猜乳燕尋簾日幾回畫閣許窺金作屋明
妝宜稱玉爲臺長因乞巧筵前見曾侍簪花會上來瑣事
從頭總堪憶嬋娟誰似不凡才

親學唐詩教綠鸚吳妝溫軟楚腰輕修眉澹寫初三月小
字新排第五名佳節中堂都拜母花前莊語祇呼兄屏風
曾寫朝雲影其奈聰明畫不成

中年哀樂感蛾眉又謝東風第一枝香冢春泥仙姥宅
花寒食女郎祠月難留影三生夢錦欲成灰四字詩欲採
白蘋薦秋水碧雲日暮悵來遲

感舊

瑤池消息阻層城心字香消感舊盟小海歌殘流水遠長
河落盡夜雲輕呼來素月疑前世問到青天抵隔生愁絕
紫簫工寫怨消魂總似別時聲

玲瓏簫局倚文紗親叩銅鑲識謝家隔幕尙畱前度字當
窗仍發去年花曾遊香國參禪悅閒譜鈞天憶夢華玉虎
絲沉金井暮夕陽疎樹總啼鴉

涼雲吹雨上蘭舟聞道湖山不解愁青鳥有情來碧海玉

人無恙隔朱樓晚花庭院空新月落葉簾櫳又暮秋十二
畫闌工宛轉莫因惆悵感清遊

髣髴絲禪榻悵華年迴首前塵祇惘然人意可如秋樣瘦苔
痕漸學唾花圓碧鷄巷陌人誰在銅雀樓臺夢不前重過
東堂聽雨地彩雲歷歷散如烟

雜感

小閣停雲碧樹斜鈿車曾識孟珠家臨波新柳嬌眉黛隔
樹雛鶯語歲華鸚鵡地遙留畫壁鷓鴣天遠憶紅牙簾櫳
更在蓬山外隔斷雕闌白玉花

玉河芳草又娟娟絮亂絲繁感歲年薛曲桃花寒食路杜
陵槐葉冷淘天青鸞信杳空迴首金鴈箏停記拍肩繡被

不眠香又燼舊家往事總如烟

曲瓊簾卷玉雙鈎拂舞歌殘楚調秋紅藕香銷鴛鳥冷白
蘋花謝鯉魚愁意中好月如天遠夢裏繁星逐水流聞道
湖山好行樂爲君重築第三樓

青鳥啼香事有無離離煙雨長春燕翠屏影裏憐紅拂鈿
蓬聲中感綠珠桃葉渡江遲畫檝苔花經雨上銅鋪金莖
不解相如渴愁憶文君舊酒鑪

夜起

紗屏涼翠影鱗鱗枕簟無情夜起頻萬籟併隨蟲語寂繁
花靜覺妙香親空烟澹似初回夢殘月淒如欲別人祇有
情根不能滅擣瓊成屑麝成塵

感舊

往事迴頭已十年舊愁如水碧橫天
黛痕漸覺蛾眉瘦錦字曾勞鴈足傳
蘭芷情深懷墮月蘅蕪香澹夢成烟
今生又得重相見惆悵明鏡小閣前

花謝東風感未忘因君重憶鬱金堂
水仙小影新瑤珮神女閒情舊曲房
牆角畫闌秋葉墜湖陰香塚暮雲涼
不堪更話當年事一度相思一斷腸

讀吳門女史金纖纖逸瘦吟樓遺詩

花下簾櫳月下樓玉臺簪筆亦風流
自憐瘦骨偏宜病天遣多情祇合愁
鸚鵡綠沉紗幔影海棠紅冷玉階秋
前身應住瑤清上偶向人間亦暫遊

鏤雪團香筆一枝關心祇有落花知人因似月留難久才
果如仙謫亦空蘭氣化烟春命短桐陰題夢雨聲遲論詩
也合稱傾國想見驚鴻絕代姿

題徧芙蓉夜雨涼韻紗零落賸餘香夢爲蝴蝶魂猶瘦脩
到鴛鴦命不長班管墨痕留翠袖珍珠小字記羅裳微吟
欲下紅粧拜如此才原未易量

似把題詩當寫真臨風如見瘦吟身可無脩竹成佳偶竟
有梅花作替人小影仙遊憐綽約秋墳鬼唱最酸辛蛾眉
都有千秋意肯使遺編付劫塵

楊蕊淵李紉蘭家雪蘭
三女士爲捐金付梓

秋水樓臺篇

吳門女士金纖纖家竹士秀才之儷也二人並工

詩吟聲相答形影無間論者比之陸東美夫婦焉
嘗同夢至一處烟水無際樓臺出沒雲氣中彷彿
有人告之曰此秋水渡也因共聯句醒而憶秋水
樓臺碧近天七字其後纖纖小病母家一夕扶病
歸謂竹士曰儂殆將不起矣昨夜夢數女伴邀登
一舟云將往秋水渡夢兆如此欲生得乎果閨十
日而卒今秋晤竹士於都門偶譚舊事灑然異之
因思閨閣中妙麗之質幽艷之才皆天上謫仙人
也秣陵王春波寫秋水樓臺圖爰題此篇

微波細碎涼烟濃玉鉤雙影低簾櫳白雲如雨蕩空碧闌
干紅濕秋陰中曲臺三五樓十二面面雕欄倚寒翠銀觴

花濃蛭蚪書瑤碑苔繡鴛鴦字魚鑰玲瓏次第開蛾眉原
是謫仙才青鸞搖尾紅鸚語認是蓬山舊主來海天攜手
同吟諷吹笙如跨秦臺鳳幾生修到比肩人一枕遊仙亦
同夢金碧高寒畫不如盈盈水氣上銅鋪乍疑河漢仙靈
闕還似瀟湘帝子居仙家日月真幽曠不是人間豈天上
此中知更有人無瑤清女伴勞相望小住塵寰亦復佳蘇
臺春雨暗銅街片帆鄧尉迷香雪尙憶西風水一涯百花
仙舫迷雲樹有人昨夜呼儂去依然秋水碧連天分明前
日黃姑渡小謫匆匆廿五年乘鸞人去玉成烟仙郎怕說
前往事曾讀南華第二篇從此人天不相見招魂欲採芳
蘭薦羅衣爭禁十分涼祇應更瘦芙蓉而我聽斯言亦愴

神空將慧業證蘭因瓊樓玉宇無雙地碧海青天第一人
佳節偏教逢七夕榆花露冷銀河白欲將道里問天孫靈
宮何處星妃宅涼影橫空浪作花月中原是有仙槎碧城
他日應相訪滄海西頭第幾家

梅卿女士偕竹士來遊雲間養疴予白苧城倉解匝
月而殂自知死期臨終澈然有絕命詩六章其二
章則指余也用步原韻以當挽詞

人間何處覓鴛鴦修到梅花命不長詩帶喘成千萬語字
經指畫兩三行叢殘絹素香銷歛惆悵音容夢渺茫百幅
嬋嫣空寫徧更無人爲寫明粧女士善畫欲寫士女百幅
未成臨終囑勿寫遺照
世味嘗深恨自平雲間歸路卽瑤京夢尋白苧城應在粧

換黃絕鏡尙明夜雨有鐙遲九死春山無石話三生鏡湖
烟水琴臺月知爾芳魂次第行

不讓青天月兩頭人天詩卷定長留艷名竝入無雙譜佳
句同爭第一流埋玉人憐秋水渡聯珠集是瘦吟樓尹邢
同穴從來少地下應知把臂遊

此首竝指纖纖女
士竹土前室也

扁舟應不悔同行玉碎崑山愴鳳鳴殘跡偶尋三泖路歸
期仍近百花生

女土誕於花朝今卒于二月三日花朝前十日也

折梅圖好春長

在采藥人歸月自明最是傷心荀奉倩春江桃葉幾番迎

又絕句二首

便非絮果豈蘭因散雪團香當寫真一角雅宜山下路年
年寒食弔詩人

爭禁到此不生愁見爾雲容掩鳳眸太息生平數知己題
詩先哭洞簫樓

原作

山陰王情梅卿

半盃梨汁半甌漿精氣消磨那得長餘火閃風偏有焰
孤鴻墮雨不成行遺詩嘔血從零落塵海回頭歎渺茫
我不戀君休戀我蓋棺只作道家粧

吾宗仙侶老方平約采夫容返玉京斷夢無依雲縹緲
淨因不昧月空明九還難向塵寰覓萬感都從魔障生
悟得去來非草草綵旛絳節導前行

浮雲散盡月當頭到此誰能半刻畱病葉戀枝終是幻
春冰泮水不迴流心空蓬島三生石夢冷元龍百尺樓

歸去碧桃開未盡人間已作一番遊

拚向懸崖撒手行匆匆況聽曉鐘鳴英雄末路歸三寶
兒女凝情誤一生已絕書香悲伯道有誰麥飯記清明
憐君未了紅塵局何日驂鸞一笑迎

又絕句二首

文字緣牽總宿因生生死死見情真請看收拾殘花骨
還是龍華會主人

便做神仙也怕愁不如歸去瞑雙眸裁雲作帳月作簾
冷臥碧城十二樓

靜女

蛾眉天遣惜芳年靜女盈盈麗若仙乍見玉顏憐嬌嬾偶

因蘭訊結纏綿高山流水琴雙瑱碧海青天月上弦我有
閒情託花葉夢中彩筆倩誰傳

袖倚飛花颺五銖美人香草種薜蘿漫勞郭璞三升豆虛
有齊奴一斛珠秋夢人應憐杜牧春愁卿本薄羅敷感他
鄭重相思意閒採蘋花向石湖

三生白石路漫漫一見真如蜀道難新月照人嬌淥水秋
花顧影惜芳蘭漢宮綽約憐飛燕唐韻聰明說采鸞擬爲
洛神畱小影凌波羅襪步珊珊

浣紗人在苧蘿村深鎖歲裝月下門繡出鴛鴦原比翼夢
爲胡蝶也銷魂可無知已憐心曲定有幽懷記淚痕祇此
惜花心一片微吟聊與寄溫存

梅花夫人

夢回翠羽萬峯前
香雪疎林澹有烟
羅襪曉寒波渺渺
霓裳夜靜月娟娟
行三定是清溪妹
第一眞成紫府仙
玉骨自憐花樣瘦
避風須坐四禪天

月夜讀都門三閨秀詩集各系一詩

仙人下太清
遊戲驂白鳳
天花散五色
碧雲遠秋夢
一卷

冰雪文晨夕
瓣香供

李晨蘭生香館集

仙人彈神雪中有太古音
天風吹夜泉一絃清
一心大海

流湯湯明月秋沉沉

楊蕊淵琴清閣集

仙人泛瀟湘
手折幽蘭花
扁舟弄明月
秋水飛孤霞
翩然

五銖衣疑是萼綠華

家雪蘭詩華館集

題吳門女士沈散花臨本唐韻

女士孝廉桐城女適同里林上舍太霞

朝衍

夫婦

工書早年同卒所書唐韻流傳人間獲與觀覽因

題是什

如君夫婦風流甚便是文簫與彩鸞玉貌丁年同慧麗繡
襦甲帳共清寒幾時跨虎山中去當日簪花鏡畔看畱得
一函唐韻在粉香零落蠹魚乾

題生香館內史茶烟煮夢小影

茶烟裊裊晝沉沉習靜支頤小院深紗幔半懸愁日照羅
衣太薄怯寒侵袖長容易沾香汗鬟重還防墮玉簪應是
夢中新得句倦眸不啓但微吟

香銷心字鴨爐溫
曾屬樵青早閉門
花氣入簾扶瘦影
蟲聲隔院碎詩魂
微融倦態紅雙頰
靜裊涼颼碧一痕
側耳瓶笙猶半沸
滿庭新月又黃昏

玉臺斑管手頻操
慣仿眞書倚采旄
一院蕉陰分草色
四圍竹雨和松濤
愁多生怕敲詩倦
腕弱還憐寫韻勞
諫果味甘回舌本
強扶殘夢讀離騷

夢中何事最逡巡
自惜娉婷畫裏身
孤坐不宐微雨夜
小眠又過落花辰
碧甌沁玉宐長夏
綠雪浮香試早春
除卻同心諸女伴
蕉陰茗話更無人

宛仙以蓮葉硯白描桃花畫幅見貽詩以奉答

華陽十賚雲林闕
珍重青綾出大家
硯匣香濃碧蓮葉
畫

屏仙影白桃花琴河水淺迷三島墨會人遙夢九華付與
鷗波好收拾芬陀猶帶蕊宮霞

題張若素女史自寫小影和孫蓮水

分明僊韻比芳蘭似爾蛾眉秀可餐日暮碧雲天渺渺月
明羅襪步珊珊含愁獨對珠簾靜倚病還憐玉鏡寒應是
秋心太孤寂自家寫影自家看

香修詞爲嚴蕙楊作

香修姓張氏初名秋月幼媵於無錫嵇相國家蕙
楊娶於嵇乃謀諸中閨而胖合焉且援十六觀經
戒香熏修之語字之曰香修華司馬秋槎屠孝廉
琴塢爲寫秋江載月團扇貽之蕙楊因以畫扇名

齋且遍乞題句爲簪花集

一江春水遠如天舊約分明十載前
記向石鐘山下見銷魂人在木蘭船

紅鸚簾外韻同圓學誦唐詩日幾篇
解爲蛾眉寫秋怨吳

綾祗繡李青蓮

香修愛誦太白美人捲珠簾絕句

三五冰輪是小名秋同消瘦月同明
一聲水調歌桃葉自向江頭打槳迎

小影凌波欲避魚水花香氣散明珠
錢塘畫史風流甚替寫秋江載月圖

碧玉何曾是小家青衣脫後更風華
妙香十種團瓊珞身是西天稱意花

平寫華嚴懺性靈玉臺香近畫紗櫺連環小印綢繆字紅
上蓮花白麝經

垂鬟十八妙鬢雲禪榻茶烟伴夕暝身是維摩病居士散
花人作戒香熏

繡幙輕寒好護持玉顏相對寫烏絲衍波付與春江鯉徧
乞簪花集裏詩

百萬工錢紫玉釵定情詩卷續風懷昨從碧浪湖邊過本
事新添畫扇齋

題駱佩香秋鐙課女圖

織女還須女湘靈又洛靈錦機曾識字紗幔更傳經檻外
長江白鐙前古壁青停鍼宵課永秋雨不堪聽

題京口趙靈簫女士詩

錦城花氣擁明霞石墨霏香苑碧紗應是芙蓉詩弟子玉

臺宮體仿楊家

女士受詩法于蓉裳農部

相依小妹字芸仙惆悵天涯餞別筵一片淪江江上水春

星如豆月如弦

集中句

汀州疎雨盡樓寒五字微吟祇自看我識江南李秋鴈新

詩傳寫徧長安

聞鴈詩最佳李秋鴈謂晨蘭也

苕溪女士趙蘭素遺詩

苕溪流水學羅裙殘墨如烟易斷魂畱得鷗波家法在閨

中人是趙王孫

鏡冷樓空黯綺疏櫻桃花落月生初微雲堦是元二子遺

草從頭寫誦餘

想見蘭閨寫韻時小姑才筆亦相宜如何宮麝泥金扇不

寫楊家妹子詩

小姑貝芝能詩工書

題閭僊女士墓銘後

女士民華名媛字淑玉吳郡人能詩善書適新安

何參軍介夫年二十七卒參軍隸其軼事爲曇花

小影海昌查伯葵爲撰墓銘余題其後

孝婦膏成藥有靈慈姑從此更延齡最憐慵倚匡牀日猶

寫金函一卷經

一疏危言海內知紅閨深意托微詞片言家難從消釋鸚

鵒前頭五字詩

介夫將與族人訟氏適閱某公奏疏因賦鸚鵒詩以諷時年甫十七也

鍾離嫁女古風存不信嬋娟此詠敦一片苧蘿村畔月有
人相對泣黃昏

夢裏樓臺月墮烟蘭香小妹語嬋嫣玉人祇合仙山住小

謫紅塵又十年

女士渡富春江夢女伴招之有名蘭香者言世緣未了乃甦後復夢因病遂卒卒之

日室中異香四達逾數刻始散

點筆閒從倦繡餘翩翩書記問何如便應選入簪花帖百

幅蘭牋小楷書

和孫苞玉女士見題拙集之作

十年前讀蘿軒句句句清華字字新自愛高寒千尺雪不

知花月六朝春畫眉俊有同心侶顧影寒憐絕代人大息

玉臺誰作叙蘭陵才筆數洪遵

序爲雅存所作

原作

錢塘女士孫蓀意 原名琦

一編遠寄軟紅塵
艷絕詞華照眼新
早識君才非百里
卽看詩句可千春
子喬在昔原仙吏
祭酒於今得替人
想見長安冠蓋地
盡知驚坐有陳遵

風雪

風雪蓬門歲又闌
天心眞欲隕芳蘭
纖腰楚楚偏宜瘦
玉骨珊珊慣耐寒
蜀錦不成虛夜被
胡麻未熟減朝餐
清貧也識前緣定
祇是蛾眉稱意難

題戴瑤珍女士秋鐙課子圖

蘭英

紅蘭浥露濕冰絨
鄰下孤雛羽未乾
愁絕楹書親口授
夜天如水一鐙寒

暮雲斑竹泣湘靈斷雁衝寒不忍聽畱得簪花數行字自家寫在玉螭屏

霜冷經幃黯碧紗謝庭蘭玉自風華他年畫筆丹墀進一

樣南州太傅家

段若膺詩以南樓老人比之同是禾中人也

紅淚丹鉛刻意吟青琴絃絕起哀音新詩祇有嬋娟好能

寫嬌娥一片心

閩中詩以上海女士歸佩珊爲冠

徧題花葉寄朝雲一序金箱記玉晨鮑妹謝孃吾盡識禮

宗爭說戴夫人

蘭雪以其夫人蔣錦秋女史自寫石谿漁娘畫卷屬

題

漁舍板橋西青山滿石谿一竿春水碧雙槳暮雲低椎髻

期偕隱花源憶舊題南湖歸未得終日子規啼

題家雋君女史賦茗閣詩草

當年鏡裏惜瓊枝曾點蘭脣小妹詞今日女兄詩卷上一
般花韻滿烏絲

繡餘弄筆寫清酣綠綺花深月一函莫怪詩多蘭氣息玉
人家本住湘南

君家寒碧好山莊夫壻才名小鳳皇若向瀕波論管趙比
肩夫婦費商量

吾家亦有班昭在助我丹黃注晉書一卷白環花閣集他
年相較問何如

呂卿姪屬爲佳偶許宏芳女士題輕舟出峽圖

兩岸青山翠萬重一奩江鏡黛痕濃蛾眉不學橫雲樣祇
畫巫山十二峯

紅絲硯匣伴香籤點筆蓬牕興不凡正是東風好時節桃
花萬樹送春帆

爲瞿夢香題姬人浣雲小影

雛鬟小影照流紋不解爲雲解浣雲怪底一江春水色東
風吹煞似羅裙

分明仙子婉凌華暫向琴河泛落花應笑西施在塵世
蘿祇解浣輕紗

梅花用窈窕樓女士原韻

冰雪兼珠玉脩然迥出塵光凝一輪月香迥十分春素面

看原好芳心澹更眞生平數知己獨立此佳人

原作

錢蔭蓮因

生就孤芳性清標不著塵素心千點雪太古一枝春韻
絕方超俗香高合抱眞月明寥廓靜相賞屬斯人

五月十三日紀事爲管姬湘玉作

分明仙子婉凌華
暫降門前金犢車
記取合歡團扇上新
詩解誦白蓮花

好奉蘭羞玉案前
殷勤握手問芳年
三生石上前緣在
贏得高堂一見憐

湘姬鐫小印曰碧城僊館中人索余題句

碧城十二曲闌干
小印分明繆篆丹
菖玉名鐫花欲笑
蘭

金香泥墨初乾玩眉故事憐司馬寫韻閒情學宋鸞爾是
此中人第一靈犀珍重辟春寒

和作

管筠湘玉

碧城十二曲闌干仙館春陰又牡丹
緜姥蘭金香欲沈楊娃紅沫印初乾
軒中寫韻同騎虎臺上吹簫定跨鸞
誰是此中人第一錦帷分暖護輕寒

偶得仇英畫卷神似小鷗波館因付姬人湘玉並系
以詩

百年絹素未消磨山抹微雲水熨羅
珍重畫師工著意幾時寫就好烟波

一雙奇石堪爲友三百梅花好結隣
何日南湖理歸棹與

卿同作畫中人

花裏紅闌水上樓青山影澹碧羅秋美人大有瀟湘意不
羨文鴛羨白鷗

題士女畫屏同姬人湘玉作卽用原韻

紅闌干外暮天低四面幽蘭花氣微彈罷瀟湘水雲曲滿
身香露濕春衣

芙蓉不及美人粧水閣風微翠袖涼廿六成行一雙宿買
絲只合繡鴛鴦

團團桂樹露華清銀漢無聲珠斗橫花靜月明人不寐夜
天如水憶三生

簪花妙格寫烏絲繡口微吟絕妙詞一幅消寒新粉本紅

消八十一臘脂

同作

管

筠

仲姬

春山如黛暮雲低綠綺橫陳對翠微一曲冰絃寫蘭怨
湘花吹滿白雲衣

羅衣單薄稱慵粧團扇風微泥晚涼行過橋心一迴首
竝頭花下宿鴛鴦

太虛無滓十分清絡角銀河花外橫一樣嬋娟兩寒女
各將明月證前生

墨香薇露潤紅絲一卷金荃蘭畹詞閒話壽陽宮裏事
玉梅花片點凝脂

答小鵬波館用原韻

爲有凡心號謫仙登臨嘯傲入中年
禮堂書誦八千卷宮體詩裁五百篇
鏤玉新裝七寶座護花曾築四禪天
爲卿題向雲藍袖不數河東五色牋

原作

管錡湘玉

琅嬛弟子碧城仙海內才名二十年
兒女深情團扇詠

英雄本色寶刀篇

二語爲揚州張處士贈主人句
阮中丞爲書楹帖因用其語

意中

歸計尋花海夢裏微詞憶玉天
我是瑤池青鳥使掌書時復乞霞牋

湘玉小病

藥爐烟裊篆紋斜小病恹恹倚碧紗
憔悴倍憐人似玉蕭閒祇覺語如花
臨殘晉帖銷香燼讀倦唐詩側鬢鴉
翻學

隱居詩集卷六
維摩伴天女幢幢鐙影說天涯

吳淞七夕湘玉生辰牕前海棠忽開一花因爲簪之
髻上

簪向雲鬟鞞紫釵勝常道罷笑聲迴雙星會正逢今夕一
翦花應爲汝開鏡裏春痕宐碧玉墻陰秋影自蒼苔美人
曼壽天孫笑辛苦東皇爲費才

初八曉起書示湘玉

牽牛花上露如玉復如珠碧落天猶澹紅樓夢未蘇羽輕
芳樹誰綳重畫檐蛛爲問昨宵事金梭墮有無

月夜坐梅花下同湘玉作

畫闌紅損碧苔滋瘦影橫斜見一枝祇有美人同領略暗

香多在月斜時

同作

管筠

春寒凝露露華滋
銅燵吹開第幾枝
記取月明滄海上
滿身香雪詠花時

暮雨坐小瀛舟寄湘玉

濕雲簾外雨絲絲
又是虛窗夜坐時
遠夢烟江桃葉渡
閒吟深巷杏花詩
禁城殘燭人何處
水閣微波我所思
料峭春寒惆悵事
玉人歸去更誰知

得湘玉書括其意作詩一首

釣得春江雙鯉魚
腹中尺素倍愁余
道從小閣重簾下
寫向殘燈澹墨餘
子夜雙聲同宛轉
下娘十索問何如
轉從

獨處憐鵲宦勸我消閒萬卷書

書中云眷屬全歸衙齋寂寞萬卷書中君可消閒云

云

得小印於吳趨市肆鐫鴛鴦二字篆法精妙款曰鈿閣攷鈿閣梁千秋侍兒韓約素也工篆刻此或其手製歟因寄湘姬媵之以詩

玉雪盤螭沫印朱鴛鴦二字未模糊海棠葉格燕支暈配爾春羅小字書

好學鷗波寫洛神遠從江水寄魚鱗須知鏤玉雕瓊手也是花明雪艷人

湘姬斲石爲盟器鐫曰玉女洗顛盆因爲作詩

薇露蘭膏蘇合油新粧人在鈿香樓前身應是華山女玉

女盆邊慣洗頭

曉粧鄭重晚粧輕乞巧筵前避尹邢玉燕投懷蘭入夢祝
伊浣手摘明星

高髻戛戛學翠微天花吹上白雲衣爲卿更鑄嫦娥鏡照
出團圓明月輝

天外三峯碧落寒仙心縹緲託青鸞他年攜手秦關去同
向蓮花頂上看

琴河七夕湘姬二十初度書寄吳門

金風吹動鳳皇枝又是靈修度離期玉女歲華青鳥紀絳
河清淺碧雲知憐卿乞巧停鍼夜憶我看星掩卷時十索
香奩曾未寄雙魚先爲寄相思

舟行見晚霞有懷湘玉

新月蛾眉寫澹黃
明霞更似畫衣裳
遙知繡倦粧殘後
同倚高樓話晚涼

刺桐花下露蟲啼
碧樹陰陰烏欲棲
樓上晚霞看已遠
行人更在晚霞西

二十二夜泊美人灣寄湘玉

蓼花秋水掩柴關
問到題名憶玉顏
今夜江南望江北
一鉤殘月美人灣

八月初四夜淮上對月寄湘玉

碧雲日暮對徘徊
諷到閒情怨紫釵
幾點疎星一鉤月
孤舟今夜泊清淮

雲間舟中翦燭寄湘姬

香靜雕梁燕夢初
畫簾銀蒜晚風疎
紅窗月上桃花影
莫犯春寒夜作書

鈿香閣是鬱金堂
燕玉風姿勝海棠
十八雲鬟雙畫屨
憶卿新學內家粧

舟中夜雨寄靜初靜初湘姬近日自號也

浙漚蓬牕客夢知
新愁來擾鬢絲絲
當君孤枕吟秋夜
是我扁舟夢雨時
水面珠跳千百點
船頭蘆濕兩三枝
他年漁隱同歸去
一榭鷗波我所思

劉河月夜聞鐘聲因憶明人小說所載媚蘭仙子鐘聲催月下斜廊句風景殊似姬人適與同名因成

此詩書寄

媚蘭仙子解題詩七字流傳絕妙詞深院定知秋信早苦
吟何事夜眠遲斜廊月色畱殘夢野寺鐘聲感鬢絲憶到
芳名倍惆悵青天碧海共相思

琴鳴納姬吳門索詩

皎然玉潔靜蘭薰仙骨珊珊稱畫褰妙解文章悟禪偈蘇
門今日有朝雲

雪點寒梅小苑春水雲瑟調靜無塵藏嬌自有湘靈館不
學陳王賦洛神

不惜平量十斛珠香溪原是玉娘湖青山紅樹江南路好
寫扁舟載豔圖

蛾眉二八識華年秋水盈盈麗若仙我學劉楨作平視助
粧愧乏夜飛蟬

頤道堂詩外集卷六